

水經注匯校卷二十四 江西新城楊希閔卧雲校本

後魏 鄴道 元 撰

睢水 瓠子河 汶水

睢水出梁郡鄆縣

睢水出陳留縣西蒗蕩渠東北流地理志曰睢水首受陳留浚儀狼湯水也經言出鄆非矣又東逕高陽故亭北俗謂之陳留北城非也蘇林曰高陽者陳留北縣也按在留故鄉聚名也有漢廣野君廟碑延熹六年十二月雍丘令董生趙云董生隸釋作董之何氏因解為董督之義未妥仰餘徽于千載遵茂美于絕代命縣人長照為文閱案長照是人名趙本仍作長官本戴本据隸釋作長用章不朽之德其略云輟洗分餐諮謀帝猷陳鄆有涿鹿之功

水經注匯校 卷二十四

一

海岱無牧野之戰大康華夏綏靜黎物生民以來功盛莫崇今故宇無聞而單碑介立矣陳留風俗傳曰鄆氏居于

高陽沛公攻陳留縣鄆食其有功封高陽侯全云按食其侯是因其子高梁侯疥而誤有鄆峻字文山官至公府掾大將軍商有

功食邑于涿故自陳留徙涿縣有鉞亭鉞鄉建武二年世

祖封王常為侯國也趙云王常封山桑侯不聞在陳留也豈由鄉亭進封而史傳失之乎睢

水又東逕雍丘縣故城北縣舊杞國也殷湯周武以封夏后繼禹之嗣楚滅杞秦以為縣圈稱曰縣有五陵之名故以氏縣矣城內有夏后祠昔在二代享祀不輟秦始皇因築其表為大城而以縣焉睢水又東水積成湖俗謂之白羊陂陂方四十里右則姦梁陂水注之其水上承陂水東

北逕雍丘城北又東分爲兩瀆謂之雙溝俱入白羊陂陂水東合洛架口水上承坂水謂之洛架水東南流入于睢水。睢水又東逕襄邑縣故城北又東逕雍丘城北睢水又東逕寧陵縣故城南故葛伯國也王莽改曰康善矣。歷鄆縣北二城南北相去五十里故經有出鄆之文城東七里水次有單父令楊彥尙書郎楊禪字文節兄弟二碑漢光和中立也。

東過睢陽縣南

睢水又東逕橫城北春秋左傳昭公二十一年樂大心禦華向于橫杜預曰梁國睢陽縣南有橫亭今在睢陽縣西南世謂之光城蓋光橫聲相近習傳之非也。睢水又逕新

水經注匯校

卷二十四

二

城北卽宋之新城亭也春秋左傳文公十四年公會宋公陳侯衛侯鄭伯許男曹伯晉趙盾盟于新城者也。睢水又東逕高鄉亭北又東逕亳城北南亳也卽湯所都矣。睢水又東逕睢陽縣故城南周成王封微子啓于宋以嗣殷後爲宋都也。昔宋元君夢江使乘輜車被繡衣而謁于元君元君感衛平之言而求之于泉陽男子余且獻神龜于此矣。秦始皇二十二年以爲碭郡漢高祖嘗以沛公爲碭郡長天下既定五年爲梁國文帝十二年封少子武爲梁王太后之愛子景帝寵弟也是以警衛貂侍飾同天子藏珍積寶多擬京師招延豪傑士咸歸之長卿之徒免官來遊廣睢陽城七十里大治宮觀臺苑屏榭勢並皇居其所經

構也。役夫流唱，必曰：「睢陽曲。」創傳由此始也。城西門卽寇先鼓琴處也。先好釣，居睢水旁。宋景公問道不告，殺之後十年止。此門鼓琴而去，宋人家奉事之。南門曰盧門也。春秋華氏居盧門里，叛杜預曰：「盧門，宋城南門也。」司馬彪郡國志曰：「睢陽縣有盧門亭，城內有高臺，甚秀廣，巍然介立，超焉獨上，謂之蠡臺。」沈氏大成曰：蠡落戈反。亦曰升臺焉。當昔全盛之時，故與雲霞競遠矣。續述征記曰：「迴道似蠡，故謂之蠡臺，非也。」余按闕子稱：「宋景公使工人爲弓，九年乃成，公曰：「何其遲也。」對曰：「臣不復見君矣。」臣之精盡于弓矣。」獻弓而歸三日而死。景公登虎圈之臺，援弓東面而射之，矢踰于孟霜之山，集于彭城之東，餘勢逸勁，猶飲羽于石梁然。

水經注匯校

卷二十四

三

則蠡臺卽是虎圈臺也。蓋宋世牢虎所在矣。晉太和中大司馬桓溫入河，命豫州刺史袁真開石門，鮮卑堅戍此臺。真頓甲堅城之下，不果而還。蠡臺如西，又有一臺，俗謂之女郎臺。臺之西北城中有涼馬臺。臺東有曲池，池北列兩釣臺，水周六七百步。蠡臺直東，又有一臺，世謂之雀臺也。城內東西道北有晉梁王妃王氏陵，表並列二碑，碑云：「妃諱粲，字女儀，東萊曲城人也。齊北海府君之孫司空東武景侯之季女。咸熙元年，嬪于司馬氏。泰始二年，妃于國太康五年薨，營陵于新蒙之。」案此下有脫文。太康九年立碑。東卽梁王之吹臺也。基階礎尙在今建。追明寺故宮東卽安梁之舊地也。齊周五六百步水列釣臺，池東又有一臺，世謂

之清冷臺北城憑隅又結一池臺晉灼曰或說平臺在城中東北角亦或言兔園在平臺側如淳曰平臺離宮所在今城東二十里有臺寬廣而不甚極高俗謂之平臺余按漢書梁孝王傳稱王以功親爲大國築東苑方三百里廣睢陽城七十里大治宮室爲複道自宮連屬于平臺三十餘里複道自宮東出楊門之左閱案舊本楊下有州字官本戴本作楊之門左趙依沈炳巽校作楊陽門卽睢陽東門也連屬于平臺則近矣屬之城隅則不能是知平臺不在城中也梁玉與鄒校司馬相如之徒極遊于其上故齊隨郡王山居序所謂西園多士平臺盛賓鄒馬之客咸在伐木之歌屢陳是用追芳昔娛神遊千古故亦一時之盛事謝氏賦雪亦曰梁王不

水經注匯校 卷二十四

悅遊于兔園今也歌堂淪宇律管埋音孤基塊立無復曩日之望矣城北五六里便得漢太尉橋玄墓家東有廟卽曹氏孟德親酌處操本微素嘗候于玄玄曰天下將亂能安之者其在君乎操感知已後經立墓祭云操以頑質見納君子士死知己懷此無忘又承約言徂沒之後路有經由不以斗酒隻雞過相沃酌車過三步腹痛勿怨雖臨時戲言非至親篤好胡肯爲此辭哉悽愴致祭以申宿懷冢列數碑一是漢朝羣儒英才哲士感橋氏德行之美乃共刊石立碑以示後世一碑是故吏司徒博陵崔列廷尉河南吳整等以爲至德在已揚之由人苟不皦述夫何考焉乃共勒嘉石昭明芳烈一碑是隴西枹罕北次陌碭守長

騰爲左尉漢陽獠道趙馮孝高以橋公嘗牧涼州感三綱之義慕將順之節以爲公之勳美宜宣舊邦乃樹碑頌以昭合德光和七年主記掾李友字仲僚作碑文碑陰有右鼎文建寧三年拜司空又有中鼎文建寧四年拜司徒又有左鼎文光和元年拜太尉鼎銘文曰故臣門人相與述公之行咨度體則文德銘于三鼎武功勒于征鉞書于碑陰以昭光懿趙本引隸辨云文德銘于三鼎云云是蔡邕橋公碑中語非鼎銘文也下文鉞文稱是用鏤石假象云云亦邕黃成銘中語放邕集太尉橋公碑有二而謂碑文爲李友所作豈後人掇采邕集誤入他人之文耶又有鉞文稱是用鏤石假象作茲征鉞軍鼓陳之于東階亦以昭公之文武之勳焉廟南列二柱柱東有二石羊羊北有二石虎廟前東北有二閱案官本無二字今依戴趙本石駝駝西

水經注匯校

卷二十四

北有二石馬皆高大亦不甚雕毀惟廟頽構麤傳遺墉石鼓仍存鉞今不知所在睢水于城之陽積而爲逢洪陂陂之西南有陂又東合明水水上承城南大池池周千步南流會睢謂之明水絕睢注渙睢水又東南流厯于竹圃水次綠竹蔭渚菁菁實望世人言梁王竹園也趙云太平御覽引水經注云睢陽有隕石水一名漆溝左傳云隕石于宋五隕星也故老云此水有時竭涸五石存焉故名隕石水墜處爲津今本無之睢水又東逕穀熟縣故城北睢水又東蘄水出焉睢水又東逕粟縣故城北地理志曰侯國也王莽曰成富睢水又東逕太丘縣故城北地理志曰故敬丘也漢武帝元朔三年封魯恭王子節侯劉政爲侯國朱箋漢書諸侯表郡敬邱卽太邱屬沛郡注似誤引趙云注未可非也地理志山陽郡瑕邱下不云侯國沛郡敬邱下云侯國侯表中

無敬邱侯安知道元所見之本之不作敬邱乎漢明帝更從今名列仙傳曰仙人文賓邑人賣鞞履為業以正月朔日會故嫗于鄉亭西社教合服食不老即此處矣。睢水又東逕芒縣故城北漢高帝六年封酈跖為侯國王莽之傳治世祖改曰臨睢城西二里水南有豫州從事皇毓碑殞身州牧陰君之罪時年二十五臨睢長平輿李君二千石丞綸氏夏文則高其行而悼其殞州國咨嗟旌閭表墓昭敘合德式示後人城內有臨睢長左馮翊王君碑善有治功累遷廣漢屬國都尉吏民思德縣人公府掾陳盛孫郎中兒定興劉伯鄜等共立石表政以刊遠績縣北與碭縣分水有碭山芒碭二縣之間山澤深固多懷神智有仙者涓子主柱並隱碭山得

水經注匯校 卷二十四

道漢高祖隱之呂后望氣知之即于是處也京房易候曰何以知賢人隱師曰視四方常有六雲五色具而不雨其下賢人隱矣。

又東過相縣南屈從城北東流當蕭縣南入于陂案原本及近刻並訛作入于睢考睢水與梧桐陂水互相通注故經敘睢水言入于陂今改正趙本仍舊作入于睢而解云此睢水是別水支流所滙而非是受葢蕩渠之睢道元故以出入回環更相通注調停之此說存參

相縣故宋地也秦始皇二十三年以為泗水郡漢高帝四年改曰沛郡治此漢武帝元狩六年封南越桂林監居翁為侯國曰湘成也王莽更名郡曰吾符縣曰吾符亭睢水東逕石馬亭亭西有漢故伏波將軍馬援墓睢水又東逕相縣故城南宋共公之所都也國府園中猶有伯姬黃堂

基堂夜被火左右曰夫人少避伯姬曰婦人之義保傅不具夜不下堂遂遇火而死斯堂卽伯姬燬死處也城西有伯姬冢昔鄭渾爲沛郡太守于蕭相二縣與陂堰民賴其利刻石頌之號曰鄭陂。睢水又左合白溝水水上承梧桐陂陂側有梧桐山陂水西南流逕相城東而南流注于睢。睢盛則北流入于陂陂溢則西北注于睢出入迴環更相通。注故經有入陂之文。睢水又東逕彭城郡之靈壁東東南流漢書項羽敗漢王于靈壁東卽此處也。又云東通穀泗服虔曰水名也在沛國相界未詳。睢水逕穀熟兩分睢水而爲蘄水故二水所在枝分通謂兼稱穀水之名蓋因地變然則穀水卽睢水也。又云漢軍之敗也睢水爲之不

流。睢水又東南逕竹縣故城南地理志曰王莽之篤亭也李奇曰今竹邑縣也。睢水又東與澤湖水合水上承留丘縣之溲陂南北百餘里東西四十里東至朝解亭西屆彭城留丘縣之故城東王莽更名之曰善丘矣其水自陂南系于睢水。睢水又東南八丈故溝水注之水上承蘄水而北會睢水。又東逕符離縣故城北漢武帝元狩四年封路博德爲侯國王莽之符合也。睢水又東逕臨淮郡之取慮縣故城北昔汝南步遊張少失其母及爲縣合遇母于此乃使良馬踟蹰輕軒罔進顧訪病姬乃其母也誠願宿憑而冥感昭徵矣。睢水又東合烏慈水水出縣西南烏慈渚潭漲東北流與長直故瀆合瀆舊上承蘄水北流八十五

里注烏慈水烏慈水又東逕取慮縣南又東屈逕其城東而北流注于睢。睢水又東逕睢陵縣故城北。漢武帝元朔元年封江都易王子劉楚為侯國。朱箋史表作睢陵侯何云漢表作淮陵侯王莽之睢陸也。睢水又東與潼水故瀆會。舊上承潼縣西南潼陂東北流逕潼縣故城北。又東北逕睢陵縣下會睢水。睢水又東南流逕下相縣故城南。高祖十二年封莊侯洽耳為侯國。應劭曰相水出沛國相縣。故此加下也。然則相又是睢水之別名也。東南流入于泗。謂之睢口。經止蕭縣。非也。所謂得其一而亡其二矣。

瓠子河出東郡濮陽縣北

縣北十里即瓠河口也。尚書禹貢雷夏既澤。雝沮會同。爾

水經注匯校 卷二十四

雅曰水自河出為雝。許慎曰雝者河雝水也。趙氏一清曰道元敘雷澤

甚詳而澹沮甚略二水禹貢著名之水不容不詮要在雷澤之傍者近道元注甚鶻突且移而被之岐西之雍沮專門名家之學疏謬若此真卷中一話柄也暨漢武帝元光三年河水南汎漂害

民居元封二年上使汲仁郭昌發卒數萬人塞瓠子決河。于是上自萬里沙還臨決河沈白馬玉璧合羣臣將軍以下皆負薪填決河上。悼功之不成乃作歌曰瓠子決兮將奈何。浩浩洋洋慮殫為河。殫為河兮地不寧。功無已時兮吾山平。吾山平兮巨野溢。魚沸鬱兮柏冬日。正道弛兮離常流。蛟龍騁兮放遠遊。歸舊川兮神哉沛。不封禪兮安知外。皇謂河公兮何不仁。汎濫不止兮愁吾人。鬻桑浮兮淮泗滿。久不返兮水維緩。一曰河湯湯兮激潺湲。北渡迴兮

迅流難。舉長菱兮湛美玉。河公許兮薪不屬。薪不屬兮衛人罪。燒蕭條兮噫乎何以禦水。隕竹林兮榘石菑。宣防塞兮萬福來。于是卒塞瓠子口。築宮于其上。名曰宣房宮。故亦謂瓠子堰為宣房堰。而水亦以瓠子受名焉。平帝已後未及脩理。河水東浸。日月彌廣。永平十二年。顯宗詔樂浪人王景治渠。築堤起自滎陽。東至千乘。一千餘里。景乃防遏衝要。疏決壅積。瓠子之水絕而不通。惟溝瀆存焉。河水舊東決。案近刻訛作河。閔案趙本決作流。逕濮陽城東北。故衛也。帝顓頊之墟。昔顓頊自窮桑徙此。號曰商丘。或謂之帝丘。本陶唐氏火正閼伯之所居。亦夏伯昆吾之都。殷相土又都之。故春秋傳曰閼伯居商丘。相土因之是也。全云帝邱豈商邱耶。閼伯之商邱在

水經注匯校

卷二十四

九

睢陽非帝邱也。王伯厚云非蓋承帝王世紀之謬。趙云寰宇記衛南縣東北七十里土山村即古帝邱。衛成公遷于此。鄭氏以商邱當之。真屬臆說。衛成公自楚丘遷。此秦始皇徙衛君角

于野王。置東郡治濮陽縣。濮水逕其南。故曰濮陽也。章邯守濮陽。環之以水。張晏曰依河水自固。又東逕鹹城南。春秋僖公十三年夏會于鹹。杜預曰東邵濮陽縣東南有鹹城者是也。瓠子故瀆。又東逕桃城南。春秋傳曰分曹地自洮以南。東傳于濟。盡曹地也。今鄆城西南五十里有姚城。或謂之洮也。瓠瀆又東南逕清丘。北春秋宣公十二年經書楚滅蕭。晉人宋衛曹同盟于清丘。京相璠曰在今東郡濮陽縣東南三十里。魏東都尉治東至濟陰。句陽縣為新溝。

瓠河故瀆又東逕句陽縣之小成陽城北側瀆帝王世紀曰堯葬濟陰成陽西北四十里是爲穀林墨子以爲堯堂高三尺土階三等北教八狄道死葬蛩山之陰山海經曰堯葬狄山之陽一名崇山二說各殊以爲成陽近是堯冢也余按小成陽在成陽西北半里許實中俗謔以爲囚堯城士安蓋以是爲堯冢也瓠子北有都關縣故城縣有羊里亭瓠河逕其南爲羊里水蓋資城地而變名猶經有新溝之異稱矣黃初中賈逵爲豫州刺史與諸將征吳于洞浦有功魏封逵爲羊里亭侯邑四百戶卽斯亭也俗名之羊子城非也蓋韻近字轉耳又東右會濮水枝津水上承濮渠東逕沮丘城南京相璠曰今濮陽城西南十五里有

沮丘城六國時沮楚同音以爲楚丘非也又東逕浚城南西北去濮陽三十五里城側有寒泉岡卽詩所謂爰有寒泉在浚之下世謂之高平渠非也京相璠曰濮水故道在濮陽南者也又東逕句陽縣西句瀆出焉濮水枝渠又東北逕句陽縣之小成陽東垂亭西而北入瓠河地理志曰濮水首受沛于封丘縣東北至都關入羊里水者也又按地理志山陽郡有都關縣今其城在廩丘城西考地志句陽廩丘俱屬濟陰則都關無隸山陽理又按地理志郝都亦是山陽之屬縣矣而京杜考地驗城趙云京杜者京相璠杜預也又並言在廩丘城南推此而論似地理志之誤矣或亦疆理參差所未詳瓠瀆又東逕垂亭北春秋隱公八年宋公衛

侯遇于大丘經書垂也京相璠曰今濟陰句陰縣小成陽東五里有故垂亭者也

又東北過廩丘縣爲濮水

瓠河又左逕雷澤北其澤藪在大成陽縣故城西北十餘里昔華胥履大跡處也其陂東西二十餘里南北十五里卽舜所漁也澤之東南卽成陽縣故史記曰武王封弟叔武于成應劭曰其後乃遷于成之陽故曰成陽也地理志曰成陽有堯冢靈臺今成陽城西二里有堯陵陵南一里有堯母慶都陵于城爲西南稱曰靈臺鄉曰崇仁邑號脩義皆立廟四周列水潭而不流水澤通泉泉不耗竭至豐魚筍不敢採捕前並列數碑枯柏數株檀馬成林朱箋檀馬或謂

水經經匯校

卷二十四

十一

檀與駁馬也詩疏云駁馬梓榆也諺曰斫檀不諦得槩迷槩迷尙可得駁馬言三木之相似也

列馳道逕通皆以磚砌之尙脩整堯陵東城西五十餘步中山夫人祠堯妃也石壁階墀仍舊南西北三面長櫟聯蔭扶疎里餘中山夫人祠南有仲山甫冢冢西有石廟羊虎傾低破碎略盡于城爲西南在靈臺之東北按郭緣生述征記自漢迄晉二千石及丞尉多刊石述敘堯卽位至永嘉三年二千七百二十有一載記于堯妃祠見漢建寧五年五月成陽令管遵所立碑文云堯陵北仲山甫墓南二冢間有伍員祠晉大安中立一碑是永興中建今碑祠並無處所又言堯陵在城南九里中山夫人祠在城南二里東南六里堯母慶都冢堯陵北二里有仲山甫墓考地

驗狀咸為疎僻蓋聞疑書疑耳

趙云按隸釋有濟陰太守孟郁修堯廟碑咸宗永康

元年又帝堯碑靈帝熹平四年又成陽靈臺碑建寧五年

三碑俱云水經有今本祇有漢建寧五年五月成陽令管

遵所立碑即成陽靈臺碑也。吐二碑無之蓋缺失矣

雷澤西南十許里有小山孤立

峻上亭亭傑峙謂之歷山山北有小阜南屬迤澤之東北

有陶墟緣生言舜耕陶所在墟阜聯屬濱帶瓠河也鄭玄

曰歷山在河東今有舜井皇甫謐或言今濟陰歷山是也

與雷澤相比余謂鄭立之言為然故楊雄河水賦曰登歷

觀而遙望兮聊浮游于河之巖今雷首山西枕大河按之

圖緯于事為允士安又云定陶西南陶丘舜所陶處也不

言在此緣生為失瓠河之北即廩丘縣也王隱晉書地道

水經注匯校

卷二十四

年晉烈公十一年田悼子卒田布殺其大夫公孫孫公孫

會以廩丘叛于趙田布圍廩丘翟角趙孔屑韓師救廩丘

及田布戰于龍澤田師敗逋是也瓠河與濮水俱東流經

所謂過廩丘為濮水者也縣南瓠北有羊角城春秋傳曰

烏餘取衛羊角遂襲我高魚有大雨自竇入介于其庫登

其城克而取之者也京相璠曰衛邑也今東郡廩丘縣南

有羊角城高魚魯邑也今廩丘東北有故高魚城俗謂之

交魚城謂羊角為角逐城皆非也瓠河又逕陽晉城南史

記蘇秦說齊曰過衛陽晉之道

全云按胡三省曰所謂衛陽晉者以魏境有陽晉故

別之史記秦取魏陽晉是也逕于亢父之險者也今陽晉城在廩丘城

東南十餘里與都關為左右也張儀曰秦下甲攻衛陽晉

大關天下之匈徐廣史記音義云關一作開趙云徐廣十一字注中注

東之亢父則其道矣瓠河之北又有邲都城春秋隱公五

年邲侵衛京相璠曰東郡廩丘縣南三十里有邲都故城

案近刻訛作有故邲都地理志曰山陽鄉也十二字趙本仍有地理志曰山陽鄉也八字而注云鄉當作縣褚

先生曰漢封金安上為侯國王莽更名之曰城穀者也瓠

河又東逕黎縣故城南王莽改曰黎治矣孟康曰今黎陽

也薛瓚言按黎陽在魏郡非黎縣也世謂黎侯城昔黎侯

寓于衛詩所謂胡為乎泥中毛云泥中邑名疑此城也土

地汙下城居小阜魏濮陽郡治也瓠河又東逕廐縣故城

南案廐原本及近刻並訛作秬說文云廐從广秬聲濟陰有廐縣今改正地理志濟陰之屬

縣也褚先生曰漢武帝封金日磾為侯國王莽之萬歲矣

水經注匯校 卷二十四

世猶謂之為萬歲亭也瓠河又東逕鄆城南春秋左傳成

公十六年公自沙隨還待于鄆京相璠曰公羊作運字今

東郡廩丘縣東八十里有故運城即此城也

又北過東郡范縣東北為濟渠與將渠合

瓠河自運城東北逕范縣與濟濮枝渠合故渠上承濟瀆

于乘氏縣北逕范縣左納瓠瀆故經有濟渠之稱又北與

將渠合渠受河于范縣西北東南逕秦亭南杜預釋地曰

東平范縣西北有秦亭者也又東南逕范縣故城南王莽

更名建睦也漢興平中靳允為范令曹太祖東征陶謙于

徐州張邈迎呂布郡縣響應程昱說允曰君必固范我守

東阿田單之功可立即斯邑也將渠又東會濟渠自下通

謂之將渠北逕范城東俗又謂之趙溝非也

又東北過東阿縣界

瓠河故瀆又東北左合將渠枝瀆枝瀆上承將渠于范縣東北逕范縣北又東北逕東阿城南而東入瓠河故瀆又北逕東阿縣故城東春秋經書冬及齊侯盟于柯左傳曰冬盟于柯始及齊平杜預曰東阿即柯邑也按國語曹沫挾匕首刳齊桓公返遂邑于此矣

又東北過臨邑縣西又東北過在平縣東為鄧里渠

自宣防已下

何云防房古字通

將渠已上無復有水將渠下水首

受河自北為鄧里渠

又東北過祝阿縣為濟渠

水經注匯校

卷二十四

古

河水自四瀆口出為濟水

案原本及近刻並訛作自泗口出考濟水注云河水自四瀆口

東北流而為濟又河水注云自河入濟自濟入淮自淮達江水逕周通故有四瀆之名也即此今改正濟水

二瀆合而東注于祝阿也

案濟水二瀆四字有舛誤考河水注云濟水受河始自是出東

北流九里與清水合故濟瀆也是河水自四瀆口分流入濟與故濟瀆合然則二瀆當是故瀆之訛戴本此條注

云河水自四瀆口出入于濟與濟水故瀆合而東注于祝阿也趙本此條注云河水自四瀆口出會濟水二瀆合

而東注于祝阿也閱案二瀆指河濟言趙本校合今依官本而存各說互參

又東北至梁鄒縣西分為二

脈水尋梁鄒濟無二流蓋經之誤

其東北者為濟河其東者為時水又東北至濟西濟河東北入于海時水東至臨淄縣西屈南過太山華縣東又南至費縣東入于沂

時卽耐水也音而趙云音而二字注中注春秋襄公三年齊晉盟于

耐者也京相璠曰今臨淄惟有澧水西北入濟卽地理志之如水矣耐如聲相似然則澧水卽耐水也蓋以澧與時

合得通稱矣時水自西安城西南分爲二水枝津別出西

流德會水注之水出昌國縣黃山西北流逕昌國縣故城

南昔樂毅攻齊有功燕昭王以是縣封之爲昌國君德會

水又西北五里泉水注之水出縣南黃阜北流逕城西北

入德會又西北世謂之滄浪溝又北流注時水地理志曰

德會水出昌國西北至西安入如是也時水又西逕東高

苑城中而西注也俗人過令側城南注又屈逕其城南史

記漢文帝十五年分齊爲膠西王國都高苑徐廣音義曰

水經注匯校

卷二十四

樂安有高苑城故俗謂之東高苑也其水又北注故瀆又

西蓋野溝水注之源導延鄉城東北平地出泉西北逕延

鄉城北地理志千乘有延鄉縣世人謂故城爲從城延從

字相似讀隨字改所未詳也西北流世謂之蓋野溝又西

北流逕高苑縣北注時水時水又西逕西高苑縣故城南

漢高帝六年封丙倩爲侯國王莽之常鄉也其水側城西

注京相璠曰今樂安博昌縣南界有時水西通濟其源上

出盤陽北至高苑下有死時中無水杜預亦云時水于樂

安枝流旱則竭涸爲春秋之乾時也左傳莊公九年齊魯

戰地魯師敗處也時水西北至梁鄒城入于濟全云時水二支一至

梁鄒入濟者其流甚短一東行至鉅定入馬車瀆非濟入者其流甚長別見淄水注此道元所以補經也

時蓋時來注濟若濟分東流明不得以時為名尋時濟更無別流南延華費之所斯為謬矣

汶水出泰山萊蕪縣原山西南過其縣南

案其原本及近刻並訛作羸蓋後人

因注內言汶水又西南逕羸縣故城南遂憑臆妄改考注云故不得過其縣南也此句乃舉經文之誤今訂正 趙本仍作過羸縣南而詆注中不得過其縣南句為自相伐 閱案鄆氏不至自相伐自是舉正經文之誤爾當依官本為諦戴同本

萊蕪縣在齊城西南原山又在縣西南六十許里地理志汶水與淄水俱出原山西南入濟故不得過其縣南也從征記曰汶水出縣西南流又言自入萊蕪谷夾路連山百數里水隍多行石澗中出藥草饒松柏林藿綿濛崖壁相望或傾岑阻徑或迴巖絕谷清風鳴條山壑俱響凌高降

水經注匯校

卷二十四

深兼惴慄之懼危蹊斷徑過懸度之艱未出谷十餘里有別谷在孤山谷有清泉泉上數丈有石穴二口容人行入穴丈餘高九尺許廣四五丈言是昔人居山之處薪爨煙墨猶存谷中林木緻密行人鮮有能至矣又有少許山田引灌之蹤尙存出谷有平丘面山傍水土人悉以種麥云此丘不宜殖稷黍而宜麥齊人相承以殖之意謂麥丘所栖愚公谷也何其深沈幽翳可以託業怡生如此也余時逕此為之躊躕為之屢眷矣余按麥丘愚公在齊川谷猶傳其名不在魯蓋誌者之謬耳汶水又西南逕羸縣故城南春秋左傳桓公三年公會齊侯于羸成婚于齊也又西南過奉高縣北

奉高縣漢武帝元封元年立以奉泰山之祀泰山郡治也
縣北有吳季札子墓在汶水南曲中季札之聘上國也喪
子于贏博之間卽此處也從征記曰贏縣西六十里有季
札兒冢冢圓其高可隱也前有石銘一所漢末奉高令所
立無所述敘標誌而已自昔恒蠲民戶灑掃之今不能然
碑石糜碎靡有遺矣惟故趺存焉

屈從縣西南流

汶何云牟汶也出牟縣故城西南阜下俗謂之胡盧堆淮南子

曰汶出弗其高誘曰山名也或斯阜矣趙云高誘曰林其

此青州之東汶其水東北流入濰見下二牟縣故城在東

十六卷道元以牟縣胡盧堆當之誤矣

水經注匯校 卷二十四

七

是水爲牟汶也又西南逕奉高縣故城西西南流注于汶
汶水又南右合北汶水水出分水溪源與中川分水東南
流逕泰山東右合天門下溪水水出泰山天門下谷東流
古者帝王升封咸憩此水水上往往有石竅存焉蓋古設
舍所跨處也馬第伯書云光武封泰山第伯從登山去平
地二十里南向極望無不覩其爲高也如視浮雲其峻也
石壁竅窳如無道徑遙望其人或爲白石或雪久之白者
移過乃知是人仰視巖石松樹鬱鬱蒼蒼如在雲中俯視
溪谷碌碌不可見丈尺直上七里天門仰視天門如從穴
中視天矣應劭漢官儀云泰山東南山頂名曰日觀日觀
者雞一鳴時見日始欲出長三丈許故以名焉其水自溪

而東濬波注壑東南流逕龜陰之田龜山在博縣北十五里昔夫子傷政道之陵遲望山而懷操故琴操有龜山操焉山北卽龜陰之田也春秋定公十年齊人來歸龜陰之田是也閱案逕龜陰至是也依戴本移次下文過博縣西北條下蓋此方言泰山未竟不合橫斷明是鈔錯耳又合環水水出泰山南溪南流歷中下兩廟間從征記曰泰山有下中上三廟牆闕嚴整廟中柏樹夾兩階大二十餘圍蓋漢武所植也赤眉嘗斫一樹見血而止今斧創猶存門閣三重樓榭四所三層壇一所高丈餘廣八尺樹前有六井極香冷異于凡水不知何代所掘不常浚渫而水旱不減庫中有漢時故樂器及神車木偶皆靡密巧麗又有石虎建武十三年永貴侯張余上金馬一匹高二尺

餘形制甚精中廟去下廟五里屋宇又崇麗于下廟廟東西夾澗上廟在山頂卽封禪處也其水又屈而東流又東南逕明堂下漢武帝元封元年封泰山降坐明堂于山之東北阨武帝以古處險狹而不顯也欲治明堂于奉高傍而未曉其制濟南人公玉帶上黃帝時明堂圖圖中有一殿四面無壁以茅蓋之通水圍宮垣爲複道上有樓從西南入名曰崑崙天子從之入以拜祀上帝焉于是上令奉高作明堂于汶上如帶圖也古引水爲辟雝處基瀆存焉世謂此水爲石汶山海經曰環水出泰山東流注于汶卽此水也環水又左入于汶水汶水數川合注又西南流逕徂徠山西山多松柏詩所謂徂徠之松也廣雅曰道梓松

也抱朴子稱玉策記曰千歲之松中有物或如青牛或如青犬或如人皆壽萬歲又稱天陵有偃蓋之松也所謂樓松也魯連子曰松樅高十仞而無枝非憂正室之無柱也爾雅曰松葉柏身曰樅鄒山記曰徂徠山在梁甫奉高博三縣界猶有美松亦曰尤徠之山也赤眉渠師樊崇所保也故崇自號尤徠三老矣山東有巢父廟山高十里山下有陂水方百許步三道流注一水東北沿溪而下屈逕縣南西北流入于汶一水北流歷澗西流入于汶一水南流逕陽關亭南春秋襄公十七年逆臧紇自陽關者也又西流入于汶水也

過博縣西北

水經注匯校

卷二十四

九

汶水西南逕龜陰之田龜山在博縣北十五里昔夫子傷政道之陵遲望山而懷操故琴操有龜山操焉山北卽龜陰之田也春秋定公十年齊人來歸龜陰之田是也

閱案此條

原在上文今依戴本逐次此良合龜山在博縣故也

汶水又南逕博縣故城東春秋

哀公十一年會吳伐齊取博者也灌嬰破田橫于城下屈從其城南西流不在西北也汶水又西南逕龍鄉故城南春秋成公二年齊侯圍龍龍囚頃公嬖人盧蒲就魁殺而膊諸城上齊侯親鼓取龍者也漢高帝八年封謁者陳畧爲侯國汶水又西南逕亭亭山東黃帝所禪也山有神廟水上有石門舊分水下漑處也汶水又西南逕陽關故城西本鉅平縣之陽關亭矣陽虎據之以叛伐之虎焚萊門

而奔齊者也。汶水又南左會淄水。全云此又一淄水杜預所云入汶水者也鄭樵

誤以為萊蕪之淄王水出泰山梁父縣東南流逕菟裘

城北春秋隱公十一年營之公謂羽父曰吾將歸老焉故

郡國志曰梁父有菟裘聚淄水又逕梁父縣故城南縣北

有梁父山開山圖曰泰山在左亢父在右亢父知生梁父

主死王者封泰山禪梁父故縣取名焉淄水又西南逕柴

縣故城北地理志泰山之屬縣也世謂之柴汶矣淄水又

逕郕縣北漢高帝六年封董濞為侯國春秋齊城圍郕郕

人伐齊飲馬于斯水也昔孔子行于郕之野遇榮啓期于

是衣鹿裘被髮琴歌三樂之歡夫子善其能寬矣。朱箋列

期曰天生萬物惟人為貴吾得為人一樂也男女之別男尊女卑吾得為男二樂也人生有不見日月不免襁褓者

水經注匯校 卷二十四

吾行年九十矣三樂也淄水又西逕陽關城南西流注于汶水汶水

又南逕鉅平縣故城東而西南流城東有魯道詩所謂魯

道有蕩齊子由歸者也今汶上夾水有文姜臺汶水又西

南流詩云汶水滔滔矣淮南子曰貉渡汶則死天地之性

倚伏難尋固不可以情理窮也汶水又西南逕魯國汶陽

縣北閔案又西南過魯國汶陽縣北十字戴本改王莽之

汶亭也縣北有曲水亭春秋桓公十二年經書公會杞侯

莒子盟于曲池左傳曰平杞莒也故杜預曰魯國汶陽縣

北有曲水亭漢章帝元和二年東巡泰山立行宮于汶陽

執金吾耿恭屯于汶上城門基壅存焉世謂之關陵城也

汶水又西逕汶陽縣故城北而西注

又西南過蛇丘縣南

汶水又西泚水出焉

閔案趙云近刻泚水注焉舊作出焉不誤攷泚水注云泚水出東平陽上

承汶水又云泚水又東南流注于泚水則泚水所注者泚水也非汶也

又西逕蛇丘縣南縣

有鑄鄉城春秋左傳宣叔娶于鑄杜預曰濟北蛇丘縣所治鑄鄉城者也

又西南過剛縣北

地理志剛故闡也王莽更之曰柔應劭曰春秋經書齊人取謹及闡今闡亭是也杜預春秋釋地曰闡在剛縣北剛城東有一小亭今剛縣治俗人又謂之闡亭京相璠曰剛縣西四十里有闡亭未知孰是汶水又西蛇水注之水出縣東北泰山西南流逕汶陽之田齊所侵也自汶之北平

水經注匯校

卷二十四

三

暢極目。僖公以賜季友。蛇水又西南逕鑄城西左傳所謂蛇淵囿也。故京相璠曰今濟北有蛇丘城城下有水魯囿也俗謂之濁須水非矣。蛇水又西南逕夏暉城南經書公會齊侯于下謹是也。今俗謂之夏暉城蓋春秋左傳桓公三年公子翬如齊齊侯送姜氏于下謹非禮也。世有夏暉之名矣。蛇水又西南入汶汶水又西溝水注之水出東北馬山西南流逕棘亭南春秋成公三年經書秋叔孫僑如帥師圍棘左傳曰取汶陽之田棘不服圍之南去汶水八十里又西南逕遂城東地理志曰蛇丘遂鄉故遂國也春秋莊公十三年齊滅遂而戍之者也。京相璠曰遂在蛇丘東北十里杜預亦以為然然縣東北無城以擬之。今城在

蛇丘西北蓋杜預傳疑之非也又西逕下謹城西而入汶水汶水又西逕春亭北考古無春名惟平陸縣有崇陽亭然是亭東去剛城四十里推播所注則符並所未詳也趙推播所注謂京相璠春秋土地名也是注既不引其書何為濫及乎 閱案殆非濫及恐脫去播語也

又西南過東平章縣南

地理志曰東平國故梁也景帝中六年別為濟東國武帝元鼎元年為大河郡宣帝甘露二年為東平國王莽之有鹽也章縣按世本任姓之國也齊人降章者也故城在無鹽縣東北五十里汶水又西南有泌水注之水出肥成縣東白原西南流逕肥成縣故城南樂正子春謂其弟子曰子適齊過肥肥有君子焉閱案疑上左逕句窳亭北章帝下有缺文

水經注匯校 卷二十四

元和二年鳳凰集肥成句窳亭復其租而巡泰山即是亭也泌水又西南逕富成縣故城西王莽之成富也其水又西南流注于汶汶水又西南逕桃鄉縣故城西王莽之鄆亭也世以此為鄆城非蓋因巨新之故目耳

又西南過無鹽縣南又西南過壽張縣北又西南至安民亭入于濟

汶水自桃鄉四分當其派別之處謂之四汶口其左二水雙流西南至無鹽縣之郕鄉城南郕昭伯之故邑也禍起鬪雞矣全云郕昭伯以鬪雞啓禍昭伯亡後郕始歸叔孫昭子善長誤矣春秋左傳定公十二年叔孫氏墮郕今其城無南面汶水又西南逕東平陸縣故城北應劭曰古厥國也今有厥亭汶水又西逕危

山南世謂之龍山也。漢書宣元六王傳曰：哀帝時無鹽危。山土自起，覆草如馳道狀。又孤山石轉立，晉灼曰：漢注作

報山。全云八字山脅石一枚，轉側起立，高九尺六寸，旁行

一丈，廣四尺。東平王雲及后謁曰：漢世石立，宣帝起之表

也。何云：此石立乃王氏以庶姓代漢之徵，非宣帝也。秦

耳自之石所祭，治石象報山立石，東倍草并祠之。建平三

年，息夫躬告之王自殺，后謁棄市。國除，浹水又西合為一

水，西南入茂都淀，淀陂水之異名也。淀水西南出，謂之巨

野溝，又西南逕致密城南。郡國志曰：須昌縣有致密城，古

中都也。即夫子所宰之邑矣。制養生送死之節，長幼男女

之禮，路不拾遺，器不彫僞矣。巨野溝又西南入桓公河北

水經注匯校

卷二十四

水西出，淀謂之巨良水，西南逕致密城北，西南流注洪瀆

次。一汶西逕郈亭北，又西至壽張故城，東瀆為澤，渚初平

三年，曹公擊黃巾于壽張，東鮑信戰死于此。其右一汶西

流逕無鹽縣之故城南，舊宿國也。齊宣后之故邑，所謂無

鹽醜女也。漢武帝元朔四年，封城陽共王子劉慶為東平

侯，即此邑也。王莽更名之曰有鹽亭。汶水又西逕郈鄉城

南，地理志所謂無鹽有郈鄉者也。汶水西南流逕壽張縣

故城北，春秋之良縣也。縣有壽聚，漢曰壽良。應劭曰：世祖

叔父名良，故光武改曰壽張也。建武十二年，世祖封樊宏

為侯國。汶水又西南長直溝，水注之，水出須昌城東北，穀

陽山南逕須昌城東，又南漆溝，水注焉。水出無鹽城東北

五里阜山下西逕無鹽縣故城北水側有東平憲王蒼冢
碑闕存焉元和二年章帝幸東平祀以太牢親拜祠坐賜
御劔于陵前其水又西流注長直溝溝水奇分爲二一水
西逕須昌城南入濟一水南流注于汶汶水又西流入濟
故淮南子曰汶出弗其西流合濟高誘云弗其山名在朱
虛縣東余按誘說是乃東汶非經所謂入濟者也蓋其誤
證耳

水經注匯校卷之二十四終

水經注匯校

卷二十四

三

